

# In toc «da schnuz»

## Represchentaziun fantastica da «A. è in'otra»

■ (pap) Ins ha pelvaira pudì esser spannegià. Suenter las communicaziuns en las medias, suenter l'introducziun da Guadench Dazzi a l'avertura dals 12. Dis da litteratura – e cunzunt suenter in sguard sin il fegl accumpagnant da «A. è in'otra». Co vegn quel toc realisà ch'ils dus auturs *Andreas Sauter & Bernhard Studlar* n'han betg vuli scriver «tenor models u dramaturgias veglias e tradiziunals», mabain sco «puzzle», sco in «maletg che na po betg vegnir fixà»? Per dir gist a dretg or: Quai che *René Schnoz* e la partiziun rumantscha da la DKG (Dramatische Kantonsschüler-Gruppe, Cuira) han mussà en la halla Tircal tgembla, era propi «da schnuz» – per duvrar il citat jauer da Dazzi. Persvadi ha tut, tant reschia e dramaturgia sco er la realisaziun viva, giuvna e frestga – ed in pèr giadas pulit acrobatica,

### Tema dal mintgadi?

Il toc quinta d'ina giuvna che na turna in bel di betg pli tar ses ami, si' amitga, ses collegs, ses bab – insumma che na turna betg pli a chasa. Forsa ord spir amur, forsà perquai che la vita è pil mument uschè bella ch'i na po dar pli nagin augment. È A. (*Selina Puorger*) morta, arsa sper ses auto, u è'la ida tar ses Brasilian, sin il qual ella spetgava già daditg cun brama? Insumma, i restan enavos (pli u main trists) l'amant actual Biet (*Martin Cantieni*), Nina (*Tinetta*

*Rauch*), «Bongo» Hercli (*Gion Fluregn Hassler*) ed il bab Fasieli (*Erwin Ardüsser*), sustegnids d'ina vusch dal «off» (*Maurus Blumenthal*) tar lur tschertga mintgatant quasi desperada d'ina risposta. Schnoz lascha giugar sia truppa giuvna sin trais levels: En moda convenziunala sin tribuna, en parts che vegnan mussadas sco inseriments filmics e sco teater da sumbriva. Mintga-

tant mintga part per sai, bleras giadas però en diversas cumbinaziuns. E quai ha persvadi plainamain il public – l'applaus merità era lung e cordial. E già che questa truppa va sin turnea cun «A. è in'otra» pon ins mo dir «A.revair»!

13/14-11-02, 20.30, scola chantunala, Cuira;  
16-11-02, claustra, Mustér; 23-11-02, sala Puoz,  
Samedan; Fribourg (anc betg fixà definitivamain)



En l'auto da «Bongo» Hercli van tuts a la sepultura da A. – anc traumatisads da sia spariziun nunspetgada e quasi incapibla. U forsà betg? FOTO P. A. PARLI